

摘藻堂四庫全書薈要

集部

欽定四庫全書薈要

集部

宋詩鈔卷八十一  
二



詳校官候選知縣臣吳甸華

欽定四庫全書薈要卷二萬三百三十四

集部

宋詩鈔卷八十一

內閣中書舍人吳之振編

葉適水心詩鈔

適字正則溫州永嘉人淳熙五年進士為節度判

官以薦召為博士兼實錄檢討官嘗薦陳傅良等三十四人於丞相皆得人林栗劾毀朱子適上疏力爭以是重於儒林預寧宗內禪議左右趙汝愚汝愚貶

亦罷官旋召權兵部侍郎韓侂冑欲立功出師思適  
州詔以動中外改吏部兼直學士院以疾辭適不能  
止其行第勸其先防江不聽兵敗以適知建康府沿  
江制置除寶謨閣待制措置頗得宜會侂冑誅亦奪  
職奉祠者十三年以寶文閣學士卒年七十四諡忠  
定詩用工苦而造境生皆鎔液經籍自見天真無排  
迫刻縵之迹艷出於冷故不膩淡生於鍊故不枯曾  
點之瑟方希化人之酒欲清其意味足當之

馮公嶺

馮公此山民昔開此山居屈盤五十里陟降皆林廬公  
今去不存耕鑿自有餘風篁生谷隧雨旆來岩虛人隨  
亂雲入咫尺聲相呼四時草木香異類果藪腴採薪得  
崖花結綴成襟裾此亦佳窟宅可對幽人娛何必種桃  
源始入仙者圖甌閩兩邦士洵洵日夜超辛勤起芒屨  
邂逅乘輪車山人老白首名氏不見書我獨何為者拊  
身念居諸

送鄭景元

兄弟同升難高材自摧角官多復不記四載禮南獄一朝盡室去非食遭歲惡丈夫軒豁意快緊出鷹鶚忍事得無慚信有古人學建安雖閩壤桂樹美可樂合抱更連理叢生蔭州郭歲月歷幽長根株見齟齬終當作大厦積功在雲壑尚友如此君蒼天未為薄

題賈儼不忘室

賈子好脩士躬耕鹿岩阿茂木俯清泉幽處堪逶迤有

室淨槩几圖史參前羅獨能取我語標榜相巍峩我語  
不必記予意固足多物之徇外者迅若橫流波當其一  
念覺胼胝駐崩渦神丸起痿瘵厚續還暄和倫類苟通  
明軌轍寧糾訛但憂所見弱繚如附松蘿興新豈不睹  
奈此斤斧何勿令學高山所至纔獻坡如於衆稊稗收  
拾同穎禾雖云善端在坐悼良時過予先發曹掾仁義  
躬濯磨活人不知數一善襍衆瘥每識飯牛下有作甯  
戚歌至今鄉里敬墓栢垂霜柯子質復粹美藻火兼佩

珂中夜再三歎警策自詆訶未合者參辰已逝者江河  
所願天爵尊非必貴決科

陳同甫抱膝齋二首

昔人但抱膝將軍擁和鑾徒知許國易未信藏身難功  
雖愆歲晚譽已塞世間今人但抱膝流俗忌長歎儒書  
所不傳羣士欲焚刪譏訶致囚箠一飯不得安珠玉無  
先容松柏有後艱內窺深深息仰視冥冥翰勿憂兩髀  
消且令四體胖徘徊重徘徊夜雪埋前山

音駭則難聽問駭則難答我欲終言之恐復來嚙沓培  
風鵬未高弱水海不納匹夫負獨志經史考離合手捩  
二千年柔條起衰颯念烈儻天回意大湏事匪偶然不  
施用甘盡齋中榻寧為楚人弓以矢任挽踏莫作隨侯  
珠彈射墜埃塹

超然堂

晨興詣曹參使驛傳呼超庭頭頸屈退歸闔戶胥吏玩  
過門掉臂不入室宅舍空荒轉頽漏駟僕藍縷常寒乞

此堂豈可更超然  
可執掌中佛鬱每憐莊周齊物論  
遣詞曠蕩違經律  
獨稱松柏受正命  
舜何人哉盡倫匹  
萍實浮沉江漢遠  
劍氣騰擲斗牛出  
招徠鳳麟已悠緩  
琢磨圭璧強堅密  
擔擎自貴竭人力  
起倒相因廢天質  
古今問學滿天下  
分寸毫釐難細詰  
以茲凜凜觀萬事  
口不敢言心自失  
今朝幸續省倉米  
且以糜煎飽時日  
再過吳江贈僧了洪

回飈掩夾浦勢與黑樓頑  
連袂上長橋身弱屢見扛  
苟

無傾覆憂恣橫未易當坐定互驚愕師云乃其常有時  
氣力雄駕浪拍此邦熟風無失舟小艇來茫茫始悟寡  
所諳論改色據張衍小以為大空令事難量玩變不覩  
微亦乖智之方已矣勿復云聞鍾過石塘

靈巖

穹窿右俛眉天平左垂髻吳人宅沮洳茲山抑其鎮陟  
起為表著突兀數尋仞樛松頗堅瘦立石乃瑩潤兼有  
千里陂沓靄來遠韻宜乎登椒丘擺落思奮迅吳主未

亡時絕色館孤峻歌聲妙歟乃俎品窮蛤蜊援琴固停  
晷解甲仍轉瞬終歸寂寞人破釜煮枯董陳迹不足弔  
新締何勞問三年姑蘇驛空望此塔近適當熟食節煖  
氣無已吝豪風增春愁異雪損花信聊以壯遊衍歸受  
兒女艱

封門

遺墨固藏神希聖非立我斷後輒無前實右即虛左品  
定賦纖洪義明分勇懦端木語衛文洙泗皆卿佐孔子

叙夷齊後進尚鬼瑣從來一大事幾作鴻毛荷知非言  
所及結網魚受課誰持空空質放縱無不可茲門小精  
廬荒寂衆萬過欣余二三子拙力守饑餓楊花安得攬  
飛去天隅唾唯有露垂垂滿畦紅藥墮

齊雲樓

天下雄諸侯蘇州數一二都會自昔稱陪京今也貴奕  
奕拱重樓宮宮立平地虛景混空蒼囂聲收遠肆闐闐  
雖散濶欄檻皆堪記向非土木力焉能快高視湖山西

南維江海東北堅舒緩未為愚疏達終多智窮民一宵  
燈細巧雜紋織豪士三春卉妖麗亂名字侈甚見精誠  
富餘輕講肄先朝豐豫日應奉稽古義花網飛入汴石  
林鬼浮泗天然造生活始者行賑施王公占上腴邸觀  
角奇致是邦聚璀璨四顧盡憔悴狂寇誤濡足遺蕪等  
交臂艱難屢省方薄遽虧頓置因循墮和好俛仰銷年  
歲翻憐井邑盛又使編氓匱頗云魚蝦微亦已困征稅  
人生賤苟免所尚剛強氣呼鷹飽何時暴虎怒斯易吁

嗟久悵悵胡為長惴惴夜聞踏歌喧激烈動哀思吳俗  
固捷疾吳兵信遙利項梁起讐秦子弟奮投袂功成須  
力到豈必資黠慧寧羨鵲居巢盍如蛉有類未發忌先  
聞因詩良自喟

### 虎丘

虎丘之名歲二千虎丘之丘何眇然衆山爭高隱日月  
笑此拳石埋平田雖然培塿疑異物劃開陰崖十丈懸  
冢中有恨索遺指亭上無語傳枯禪偏是吳人愛山急

逐面分方誇凭立屋承隋唐良穩稱墨題熙豐尚新濕  
松梢莫遣風雨橫石盤自添苔蘚蒞春來春去吳人遊  
足璽層巔路應泣

北齋二首

頻年寄全吳解宇雜營保前廳久傾壓後舍爰歌倒常  
因霖雨後壁壞不容掃跳蛙浴漏瀦野穀媚穿果以茲  
違色養先還媿親老低頭謾商歌瞪視豁愁抱當身良  
易足遺後非長道幸今脩整畢楹桷正完好晴窗閒晝

永夜榻初涼早友朋坐雍雍燕雀鳴草草居室君子後  
華門固為寶矧伊澤國士敗棟滅塗潦繆充使者屬職  
思振枯槁人之所歆羨未必天能造卷藏姑罷歸蠹簡  
說剛浩

人情無終極匪陋則求佳寢處既少安遊燕豈不懷惟  
思舊酒務糟醕荒榛埋破瓶聚隆垤新甃連長堦種竹  
夾超然移花遠北齋及爾風露清忽感意象諧幽深容  
浪葉潤澤長芳菱亭亭兩高梧買自婁門街俟以歲屢

寒宵若萬仞崖吾留能幾日齷齪強安排方嫌樹影瘦  
復慮地勢低世間香味悅每與腥羶偕雅故使鄭清法  
語仍進俳俯同侏儒笑但恐好惡乖莫窮有限物徇此  
未腐骸

贈訥相

柯山訥相醜形模以相獲妍如予都每將氣色較官簿  
初若搏影終探符劉公實陞提刑丘宗卿加龍圖就中  
兩說最稱驗余耳所逮非人誣汎言心事依勸戒多假

名器煩邀呼君門九重遠萬里求者爭道分榮枯一身  
暫寄百骸聚植彼朱紫誰頭顱子其惜術無浪許恐負  
西山之餓夫

送鄭虞任赴京西檢法官

春風逝無涯夏潦生未已思君溯江漢行銳業難止事  
繁絲唾亂神靜魚鱗理前年浙東幕借助獲專美邊頭  
值閒暇人物盛儲峙荒村魚米場孤戍花藥市雅知足  
禪味翫世失憂喜但疑柳上白時雜髯間紫豈非久不

遇感歎妨隱几回首舊隆中畦隴長蕤蕤

張氏東園送王恭父得殿字

燕鴻不相須進趣自求便余來君其館乃復當我餞一  
春三月雨亭樹鬱霧澌絮重厄飛揚花薦堆紫茜縱有  
百壺清何能一笑遣為郎昔同甲四海初會面凜然抱  
英特霜宇搏溫霰雄辭推落筆一語不可選重來更純  
粹玉琢金就鍊漢家闡道術四達詔羣彥談經石渠觀  
會議白虎殿通方要歸宿立異豈夸衒子行若微罪天

意委深眷以其今固辭可信非始戀楚熱宜縐絺峽漲  
難短牽回舟泊書林及此未掩卷

奉賦德修西充大夫成都新園詠歸堂二首

浣花炫春溼濯錦絢晴浦成都信繁會此水工媚嫵豈  
無濠上亭蹙步難仰俯誓言違市朝卜宅近幽阻沃沃  
葵莧畦焰焰棠杏塢朝曦濕淺瀨暮色生遠渚循涯詠  
未厭引流絡其圃蘋荇依籬樊鳬雁宿庭戶長松百里  
外物象爭渺莽時平乏隱淪簞笠自歌舞岷江志東向

激射走吳楚胡為滯淫之習坎聖所許

我生海旁州古言江來鋪力浮萬頃盡坐識一溜初之  
子酌彼源紺潔玉斗邾雅韻舒煩憂逸駕陵超超詠歸  
有何意豈亦歌風乎湛湛遊無梁滔滔濟無桴縱橫洄  
伏中暮齒將焉需三閭始開闢十畝終耘鉏東西兩莊  
舍兄弟相謦呼緬哉超前規更作却後圖顧思曲肱樂  
一身匪求餘我獨無家歸羨子鐫自迂

送李郭

蓋代才難看獨手衆衆聞見其來久流風莫盛元祐時  
崛起誰當紹興後嗟君探討窮一生心通文字難力爭  
崔啄雪籬閣筆坐蟲吟露草繙書行已輕富貴須臾爾  
萬一姓名傳野史只愁垂老絕知音自送青編滿朝市  
余之視君尚少年題玉為碁何所賢期君更盡未死日  
舉世不信方知天

醫工歎重贈柳山人

柳生洲居濠北邊繇辭質野誰所傳不曾入城行賣卜

有問灾福湏呼船歎我奇疾何頻年其初過清肌凜然  
已忽腹拒遭拘攣一身盡異形質變恍若土木徒人言  
蚤知定性不生滅今安得爾庸非天醫工刃人死無律  
妄談標本從何出補勞護弱轉凝聚排寒盪濕加淫鬱  
挾風上行關膈失逆肉糜皮併為一猶云無傷乃餘疾  
生雖憐我謬時命豈悟顛倒緣此物彼蒼應有司殺者  
授柄於工無乃悖我勞萬事明當休自古零落歸山丘  
但疑畏死復不活熟視重為諸醫羞餘聰殘明不可留

治命已乖妻子謀執訊空貽朋友憂柳生聽罷掉頸笑  
既有主對非吾尤山歌靜夜聲宛轉更著此曲歌中流

宿石門

好溪瀉百壑南北傾萬峰山凡堆阜俗映岸羞為容石  
門忽秀出老幹蔭渟洪捨舟從口入便已離塵中衆芳  
拱窟宅環洞獻奇穠藤蘿異態度尺寸疑施功錦茵翠  
織成照耀無春冬水行千丈高歛薄不可窮更有洗頭  
盆雲深霧常封昔年謝康樂築居待其終繼作者丘裴

語言亦稱雄邈然百世後未忝騷人風栖栖三羽衣日  
晏齋厨空之子歇過漿顰洗氛埃胸自歎苦淹留寂寞  
不易供嗟我老無用佞山久成翁結廬會昌側勢落魚  
蝦叢種竹似束葦栽松如斷蓬小兒餽盆盂何時至周  
公會當同此佳代輸助之春

淨光松風閣

城中雲日如火催淨光行食聲轉雷不知何處白蘋起  
便有滿坐清風來莫言作樓非急務翁當運斤兒執鋸

待得三間著此風  
病叟扶攜上樓去

朱娘曲

憶昔剪茅長橋濱  
朱娘酒店相為隣  
自言三世充拍戶  
官拋萬斛嗟長貧  
母年七十兒亦老  
有孫更與當壚否  
後街新買雙白泥  
準擬設媒傳歸好  
繇來世事隨空花  
成家不了翻破家  
城中酒徒猶夜出  
驚歎落月西南斜  
橋水東流終到海  
百年糟丘一朝改  
無復歡歌撩汝翁  
回首尚疑帘影在

送曹器遠

曹子苦心懷百憂古人遠矣思同流平生未得雄豪力  
今日便官卑微休麻源洞裏瓊葉雨南草市上蘆花秋  
十年老語為誰了西望滄江空白頭

新移瑞香舊曾作文忘之因今追憶云

一株當三春名花不易得百年等尋丈不博千乘國野  
人三十本強賣青銅百應怜跼蹐具苦為薪米迫移栽  
向明陽妃媛儼行列土膏合根性功用成夙昔除香出

淺紫泣露輕脉脉含愁欲誰訴折去情更惜方求蔽蒂  
陰未受搔擢厄嗟余自羈旅何以慰新客慙勤深夜來  
少待山月白

與英上人遊紫霄觀戲述短歌

野水隨路曲東風得木鳴景物已和柔川原倍敷榮茂  
桑高既條細草亦叢生眷言雲外士及此塵中行南臨  
大陂出波面與心平道旁古精廬黃茅間榛荆會集傾  
遠村裳衣自鮮明銀釵插仙丹歌笑喧嚶嚶何以勞比

金匱口人卷八十一  
隣粃粃雜餼錫去年穀不飽白骨今縱橫等為造化役  
未究悲欣情歸來日已夕舊徑成溝坑大車者誰子不  
寐方宵行死魄未滿眉摘埴將安程感此良自哂抱谷  
非鸛鷀

月波樓

下林百菓春自花屋藏汀陰泉著沙光風膩雪誰安措  
煩紅密翠空歌斜愛君樓高出江上百里江山開四向  
峻屏森聳遠更寒紋練縈回靜猶浪孤潮夜卷西頭來

海門推出水崔嵬豈知星河遭映奪只使鸛雀常驚猜  
此村風俗淳且魯接樹移花今復古勸君種學化兒孫  
不須擁妓呈歌舞

賦董季興玩書巖

玩書巖裏刻成真水簾花髮春復春一朝歛策去何所  
來者對之如古人美哉骨清神亦爽西瞻匡廬東雁蕩  
滿車圖畫常載行到處名山留塑像

蜂兒榷歌

平林常樞啖狸蠻玉山之產升金盤其中一樹斷崖立  
石乳蔭根多歲寒形嫌蜂兒尚粗率味嫌蜂兒少標律  
昔日取急欲高比今我細論翻下匹世間異物難並兼  
百年不許羸栽添餘甘何為滿地澁荔子正復漫天甜  
浮雲變化嗟俯仰靈芝醴泉成獨往後來空向玉山求  
坐對蜂兒還想象

登北務後江亭贈郭希呂

壁上陋室銘門外剪茅亭小市魚蝦散寂寂大江風浪

來冥冥郭翁雖老猶貌澤腹貯今古心和平只應獨將  
笏拄頰清坐都不挂毫髮何必隨逐欄頭奴日招稅錢  
三萬億前靈運後延年桑麻舊國常宛然城頭路闕總  
令好不知於人安穩否

送程傳叟

茂苑臺高春日明君顏如花楊柳青蕭條別離風雨外  
楊柳自青君貌改誰知仰天慙天公三辰五星在心中  
老作海頭新主簿蜃氣錯雜迷西東去年無禾雖種菽

乞命只指今年熟家人未可便喜歡少待上司催結局

露星亭

斗杓點翠為此城四郊環拱來遙青知君欲覽衆山小  
取埽磨就天上亭身心合於高處着萬象不語森湊泊  
古今日色遞淺深志士可惜虛光陰

明覺寺

雲山尖頭海潮湧九月天雪山葉重道人高絕但危坐  
山魑野虎皆趨拱住山三載兩遭荒侍者餓損扶參堂

沿村索米未為耻莫令木魚化龍鐘透水

送王通判

左原冢孫產巴東山靈地秀兼長雄自小赤心天與通  
可惜五十方治中北風吹沙暗中渡不合吹君落南去  
水有子魚山荔枝借我箸食前籌之

自羅浮行田宿華嚴寺

浮山昔飛至與羅合其巔嚴冬樹色改青松耀紅鵲不  
種自生植屢代常蒼然我病不暇耕行復觀我田呼扶

偃蹇後情護龍鍾先僮客四面集畦疇相勾連敢云歲  
晏休翻犁趁晴暄民政今古殊憂樂豈異源收身卧荒  
刹朗月前夜圓鵲懶附枝靜聽飢嗅牀穿為農悔不早  
時發棹歌旋

送鞏仲同

花溪初逢日苦短湔洲重尋意更長天催鵲鷁玉樓去  
激流不並龍洲旁春風忽高行旆起酒盡何如添野水  
古來交契看老時與公安得輕別離

送林退思四川分司茶馬幹官

棄繻詆關吏廣殿射高名方從媚子引豈料讒夫傾京  
師恩暮降蜀道險朝升執手郭西門惻愴難為情有山  
擎空雪有谷匝底冰鳥樂謾後譟猿孤定先鳴漢中王  
霸地從古鋒鏑爭崩摧韓信壇闕落張魯營感子奮衣  
去客猛意自輕笑我老何怯萬里今橫行

送龔叔虎

寺暗莓苔深歲潦雷電粗問胡旅窮舍鑽燧煮菜蕪答

云自孩童蚤識竈下梧逡巡四十載翻着火上爐今昔  
豈異能聞見終殊途德衰嗟教薄筆退怜詞枯何以充  
我求往衆歸裝孤子文如繡輦子行如水壺世惟春華  
翫爾用秋實舖去從孔鸞翔勿受斥鷃呼

趙成父築亭上饒即用東里舊圃勝曰魚計

秦僑洛寓隨南公新條復欲無開封亭名若有土斷法  
鄭圃豈在章泉中舊魚遙應化龍去今魚且復波間住  
人為魚計魚未知今樂莫忘昔日悲

許敬之用余言作松山草堂然遊山之意猶未已  
也申以為箴

許子家住松山邊門開路闢登山巔千年茂樹不改葉  
百尺甘井常流泉堂中悄然人境絕時有剝啄延臞仙  
天下之山皆若此捨而外求徒喪已卑能蘊高而為謙  
高能生明是為貴芒鞋價長今安之撰屨欠伸吾老矣

送蔡子儔

彼友蔡氏子任也堪將相唯儔亦異材朗立萬人上吾

嘗扣其微事詣理亦暢雨露待堅成風波豈凋喪醢鷄  
發淺覆監虎背新樣侵尋墮老醜鬚屢監當繁霜生  
野色行李正淒愴恐子復未平因書寄無恙

送陳壽老

天台雁蕩車接軫青田又促半潮近冠岩帶磴無俗情  
秋幹春莢競時盡老窮望絕華軒過其誰幽尋穿薜蘿  
更抽竒筆向雲射破的疊中千駕鵝古今文人不多出  
元祐惟四建安七性與天道亦得聞伊洛尋源未為失

閨風招手遊太玄麻頭制尾中興年黃金鑄印宵輕佩  
定把堯舜陳王前我家磬懸仰見斗簸君紅旗魑魅走  
密房燄短夜更長雪高水深去無鄉

題鄭大惠詩卷

憶從草廬赴隣炊澁雪攪筵糟涌糜要當醺酣活膚湊  
不許雕刻妨肝脾何年兒孫錦裯裂金塗門扉玉為切  
吟中得眼萬象通浪吹狂歌總休歇兩家至今住連牆  
讀書聞鷄夜相將經明先入韋平室句好還升李杜堂

孔鍊士話龍虎山之勝於其行因以送之

羣嶂倚天傍四環中峰受拱低伏蹲雲錦交流紫團外  
却注彭蠡如傾奔道陵已去丹竈冷今代符行妖鬼靜  
孔師何事亦逃儒為愛冰林雪蒙頂我居無山冬不雪  
只受虛空滿輪月子能作意肯重來更待牆東荀堪掘  
送呂子陽自永康攜所解老子訪余留未久其家  
報以細民艱食急歸發廩賑之

收纓古蜜浦抱袂生薑門九九書自註邀余綴篇端久

衰余學廢彌隱子道尊時維冬雷數雲雪常晝昏火把  
起夜色丁髯明齒痕小邦肥瘠闕鰕蛤濫充盤椒橙失  
滋味糝絮勞傾吞詰朝報家問剪書徵阿孫苦陳鄉人  
饑采蕨啖其根倉封井花滿淘米安得渾覓翁如覓父  
願假東飛翰念之不遑處喟焉整歸鞍我老澹百慮身  
世兩莫存欲私一壠潤豈救大培乾西城柳搖搖北寺  
江漫漫勿令嗟來死以慰行路難

送葉任道教授之官靜江

太學奏文夸第一國子先生裏行立嶺南梅花太枯澁  
花豈喚人人底急爐亭雪深叫孤鴻傳書為懇明光宮  
雲翻雨覆古來有不如堂堂金石守

送陳漫翁

笠澤老龜蒙蛹卧絲自理君從蓮葉畔親領末後語憐  
我未得聞獨繭受長緒因茲服英悟郁郁副奇許士於  
淪胥中搏手架欄柱一瓦不漂零百世保風雨轉圜信  
無難滅木猶有懼高翔要深泳厚積堪重負狂波浸三

伏回壑萬流阻旅情方夷猶霽色待舒吐樵峰濃黑散  
蓼岸微紅聚進舟石門灘小泊看佳處

端午行

仙門諸水會流下瓦窰溝中有弔湘客西城南北樓旗  
翻稻花風棹澁梅子雨夜邇無騷音絳紗蒙首去

趙振文在城北廂兩月無日不游馬塍作歌美之  
請知振文者同賦

馬塍東西花百里錦雲繡霧參差起長安大車喧廣陌

問以馬塍云未識醅醑縛籬金沙牆薜荔樓閣山茶房  
高花何啻千金直著價不到宜深藏青鞋翩翩烏鶴袖  
嚴勞引首金蔣後隋園摘藥煎凍酥小分移牀獻春酒  
陳通苗傳昔弄兵此地寂寞狐狸行聖人有道責草木  
我輩栽花樂太平知君已於茗水住盡日艣聲搖上渚  
無際滄波蓼自分有情碧落鷗偏聚追逐風光天漫許  
拋擲身世人應怒君不見南宮載寶回何如趙子穿花  
去

王宗卿答春堂

春以喻母慈慈深春不如兒欲答母恩恩重答無餘華  
堂頓有雲嶺隔夢裏分明與親劇阿連進奉新批勅翠  
裘黃簡緣兄得朝騰異章乞祠官願身暮歸怡母顏老  
農邀君勿輕去萬紅千紫扶春住雨田自種晴田收好  
是天留答春處

送鄭丈赴建寧五首

過家鄉里敬將母士夫榮得失從人論行藏獨自明百

年中古少一笑萬金輕廉士吾何敢新茶可擷英

有志雖身健開心在歲寒一時諸老盡多見大名難湖  
海方連旱甌閩適少寬為州人不乏千萬強加餐

清廟圖書寶熙朝雅頌音頻繁三節召荏苒二毛侵衣  
食家纔足丘園意亦深卧聽牀下士時作武侯吟

海內言華萼功名動搢紳十年長隱吏一語必驚人酒  
量新來減交情老更親公知如促膝剩把古書陳

屏棄誠愚分牢愁更索居若逢知己問猶解課兒書地

僻門長閉年饑菜自鉏相望無一事不是故情疎

何參政挽歌二首

退食勤稽古當朝動引經人心喜偏側國脉要勻停  
二府蚤聞政三孤晚告靈羔裘惜光彩不官到頭廳  
宿昔叨殊眷尋常款直廬聽鷄催謁駕立馬待紬書零  
落誰存者追尋昨夢餘何曾喚石介韓愈自狂疎

題費肅校書遺事

欲識隱居者當年費懿恭却辭金馬直歸臥錫山峰兩

詔終不起一瓢長自從兒孫盡登第勿剪舊栽松

送鄧諫從制幹

援引亦未力聲名空復傳終攜太平策還上蜀江船帆  
色挂曉月艣音穿夕煙滄波不盡興收拾浣花邊

題柳山人壁二首

水北柳六一家傳擲卦靈秋清演漁曲春近著牛經掩  
肆花竹秀排門相橘馨應憐喜功者虛要峴山銘

我病屢移卜山人不面謾常言千日厄未許一朝安地

上庸醫滿天邊惡曜攢歸根與復命自笑此何難

宿覺庵

宿覺名未謝殘山今尚存暫開雲外宅不閉雨中門  
麥熟僧常餓茶枯客謾吞荒涼自有趣衰病遣誰言

贈勝上人

近日能吟者黃巖說勝師語生兼老筆體重帶幽姿  
遣臘冰千筍勾春柳一絲方山最高頂不擬到茅茨

題張提舉園

竹外萬雲合荷心一雁來若無歌舞鬧應有鬼神猜野  
岸鉏難遍幽根煖易栽前山未放入好閣更南開

送謝希孟

白頭趨幕府蚤已負平生未放鵬舒翼應須驥歛程驛  
梅催凍藥枕雨送春聲為語常平使開懷待子荆

贈徐靈淵

歐虞兼褚薛事遠跡為塵今日觀來翰如親見古人盡  
歸嚴號令富有活精神碑板荒唐久遙看走四隣

戴肖望挽詞二首

巖巖蕭太傅  
寥寥鄭尚書  
可惜流光晚  
翻無急詔除  
交情梅蘂盡  
哀意柳芽疎  
只有安江滿  
長涵夜月虛

老失平生友  
悲尋路轉迷  
水肥應返釣  
田瘦合歸犁  
草與地蕭瑟  
雲垂天慘淒  
無因再商略  
短日送寒鷄

贈蔡茂才貫之子與

蔡家五千卷  
藏向石庵中  
講誦今幾日  
飄零隨隕風  
隔垣孤響度  
別井暗泉通  
安得無爰象  
與將吾道東

余知府挽詩二首

壽者福之首中兼典郡來聖知天上事磨盡世間材此  
際靈龜往何方化鶴回所親都不恨有識自興哀  
憐我抱空意髻間饒白絲已從真率集那復少年時柳  
慘春前葉松鉞雪後枝建炎無故老難話省方悲

贈聽聲歐陽承務

無心立臧否有術驗榮哀舉世聲中動浮生骨帶來彈  
輕知福地欬小應靈臺笑我老何及是身惟死灰

送包通判兼寄滕季度

風雨逍遙地倚排印簾新鈿車分路潤寶瑟聽歌頻燈  
市曉侵月花田晚占春却過張翰宅方信有閒人

趙尚書挽詩二首

材業將時偶聲名關寵新文昌留不佳大尹政通神力  
說和我好從撩相國嗔春花插秋髻還得自繇身

江北江南曲吟高許和同相迎黃篾浪失笑白蘋風老  
病猶貪活漂零各隕空長懷洞庭橘買宅傍牆東

贈盧次夔

家住東郊深能詩人共尋冰梭間道錦玉軫斷文琴城  
漏宵添滴牕花晝減陰新涼白頭句清甚費悲吟

送趙幾道邵武司戶

無灘秋水平有句官曹清楊柳欲落盡菊花愁晚生書  
多前益智文古後垂名功到潤深處天教勤苦成

贈李秀才順之

怒漲爭茅竹安流節斗門行苗存水側縮板護河源士

季昔陳義守奚能聽言便當生廟食禾熟賽鷄豚

送侯居父

宅古竹陰晚書殘燈焰稀深知靜者趣轉益宦情微別  
殿行催甲休工坐掩扉御前清切地重得薦皇闈

贈高竹有外姪

娶女已為客參翁又別行相隨小書卷開讀短燈檠野  
影晨迷樹天文夜照城須將遠遊什題寄老夫評

沈氏書堂

應與石渠並又疑金匱存晒書天象切浴硯海光翻我  
老行罷讀君材重細論猶言無一字大道始歸根

薛子舒墓

悵悵西門路樵歌占晚雲  
燐迷王弼宅蒿長孟郊墳  
少病憐醫錯題書與父分  
又言重把筆兼欲使余聞

項君先有幽興堂其子木卽以名庵

平生意外事身後有誰知  
魄靜雲稀出神遊月共移  
春茶翠旗展霜荔錦幘垂  
更欲添幽興惟消桂幾枝

施翔公掌教長沙

著蔡羲前識簫韶舜後音  
追回賈誼貶喚起屈原沉  
湘水汀烟潤梅花著雪深  
余行陳迹久因子一微吟

送陳約甫知永豐

四十未朝蹟三經綰縣章  
嫁頻知子熟醫老悟身嘗  
菊趁行時色梅催到日香  
還欣肺氣減中熱變為涼

曾晦之挽詞

交遊盛處失駢駢  
筆硯窮時綰碧藍  
驥老尚能舒駿逸

龜潛終不慕芳甘壽過八十人人羨恩在鄉閭事事談  
埋沒生平無限意夜深樵唱起溪南

中洲處士折梅花并新語為贈率易鄙句為謝

中洲之中十樹梅蟠枝著地照蒿萊即非無主憑誰伴  
自不衝寒要早開午蝶只隨遊子意暮茄難寫遯夫哀  
幽懷寂寂天應笑挿向歸帆雪滿桅

送劉德修時在京口

日日秋風江倒回江邊執手重悠哉兩山只欲當中住

一舸還應却下來說與蛟龍息豪怒亦令鷗鷺少嫌猜  
吳頭楚尾何時極拈就前詩併展開

送范文叔知彭州

君今結束歸何勇我獨棲遲去不能江水入冬猶浩蕩  
風帆逼歲合騫騰相逢論事信徒爾清坐矢心嗟未曾  
想得彭州退公後夜窻重整照書燈

送潘德久

每攜瘦竹身長隱忽引文藤令頗嚴聞道將軍如卻穀

不妨幕府有陶潛  
江當濶處水新漲  
春到極頭花倍添  
未有羽書吟自好  
全提白下入詩奩

無相寺道中

傍水人家柳十餘  
靠山亭子菊千株  
竹鷄露啄堪幽伴  
蘆葍風乾待歲除  
與僕抱樵趨絕澗  
隨僧尋磬禮精廬  
不知身外誰為主  
更覺求名計轉疎

陳益謙挽詞

余與益謙居相望  
疇昔雅相揖而已  
益謙死其子以

書求哀挽言君之材與學皆余所未知也訊之王成  
信然乃為作此詩

舍南巷北水同流  
稻菽參差各自謀  
不料材多能轉物  
更憐無地與伸頭  
蛛絲委架詩書愠  
鷺羽空陂菡萏愁  
好在夜深明月滿  
人間地下兩悠悠

併工

併工催作趁春前  
又值春歸一莞然  
新筍頓能長數尺  
晚花寬與待明年  
回廊寂寂為苔地  
後塔陰陰造雨天

坐睡不驚還自覺鬢鬚將老到衰邊

菊花開送徐靈州

白頭幾度重逢九方是今年種菊花衰病自憐何處看  
馨香聊向小園誇討論搖落生光怪暖熱風霜與麗華  
正好行吟君已去別移秋色付誰家

丁少明挽詩

枕冷秋山不記年時時逸想醉看天吟成絕妙驚人句  
散盡粗浮使鬼錢萬卉有情風煖後一筇無伴月明邊

新來王子碑能說筆意堪將此共傳

宋仲方遊吳袖文索詩為別

九曲絃歌滿巷傳儒林聲價有誰先  
昔憐少學隨翁久今喜新文信汝賢  
刪後畫前元未聖南花北葉定誰妍  
終期猛進一篙力透過龍門急水船

毛憲夫挽詞

我昔髫年侍此翁自甘窮僻古人同  
道修白業曾先悟官近青雲却未通  
亭長嫩蚪新戲雨徑存衰柳舊搖風

世間榮落私情盡留得清名是至公

送趙提幹

與君中外情偏厚嗟我龍鍾志已摧豈有尋常墮泥滓  
不教宛轉助風雷花枝買笑前村趁柳帶牽情別浦催  
細雨酒亭東望處應將新語寄潮回

賀縣尉

端龐還有北人風大雅元非楚士同此日深探應徹底  
他時直上定摩空離家杳杳百灘外過我昏昏三伏中

籬破屋荒無路入荷花招手席門東

送曹潛夫

東南作闕數年徂遠遠參司到蜀都元帥幕中須受辟  
生羗界上也分符閒吟杜甫詩千字時載揚雄酒一壺  
只我衰殘望君切杜鵑聲裏認歸塗

郭伯山挽詞

兄弟窮經各一時百年義塾尚留炊講燈常照鶴窺坐  
壇杏半紅猿揀枝未奏邇功明主惜將成京秩故人悲

挽君已老應先盡安得埋銘更後垂

薛端明挽詩二首

可但補闕名官日不逢引裾強諫時上朝有疏天常納  
下殿無行誰獨疑論道何如出綸晚督軍頗嘆封侯遲  
凌煙畫手今寂寞豈菟林高荔子垂

冰稼初融闕月沉英豪四坐地爐深爭看麈尾頻揮處  
難了朱絃未盡音怪我輕談當世事知公默會古人心  
空山穩對梅花宿錯向林逋墓裏尋

題閻才元喜雪堂三首

東來十月黃塵滿  
霰點霜花總未堪  
恰是使君誠意足  
帶將臘雪赴荆南

平壓龍山五尺危  
墮鳶何處避陰威  
漸令融罷春泥輒  
麥浪黏天燕子飛

簷角低猥小凭欄  
霏霏只合對高寒  
他年認得名堂意  
不作銷金煖帳看

水心即事六首兼謝吳氏表宣義

生薑門外山如染山水娛人歲月長  
淨社傾城同禊飲  
法明闔郭共燒香

我久無家今謾歸賣田買宅事交違  
填高幫濶為深費  
柱小簷低可厚非

雖有蓮荷浸屋東暑煩睡過一陂紅  
秋來人意稍蘇醒  
似惜霜前零亂風

拒霜旋插花疎疎甘菊新移日晒枯  
花草只今如此在  
幾時寫作會昌圖

聽唱三更囉裏論白旁單漿水心村潮回再入家家浦  
月上還當處處門

吳翁肥遯逾七十木老芝荒手自鉏惠我篇章成錦字  
西隣得伴亦堪書

橘枝詞三首記永嘉土風

蜜滿房中金作皮人家短日挂疎籬判霜剪露裝船去  
不唱楊枝唱橘枝

琥珀銀紅未是醇私沽官賣各生春只消一盞能和氣

切莫多杯自害身

鶴袖貂鞋巾閃鴉吹簫打鼓趁年華行春以東崢水北  
不妨歡樂早還家

余泛舟不能具舫創為隆篷加牖戶焉

雖然一槳匆匆去也要身寬對好山新  
扣篷窻高似屋  
諸峰獻狀住中間

鉏荒

鉏荒培薄寺東隈一種風光百樣栽  
誰妒眼中無俗物

前花開遍後花開

題施紙被蔡宣義所藏孫太守褒諭帖

乞子勦勦暖凍軀押衙得得奉親書  
孫公已去蔡公死  
近日鄉人嘆不如

贈孫十五道人

將軍橋畔女仙家年與鍾馗宴與花  
欲度世人無妙訣  
睡長留日住簷牙

送呂子陽二絕

七峰斜轉斗光寒  
千仞飛來雁影寬  
生怕被君題寫盡  
更留風景後來看

好花移買自嫌貧  
浪蕖空多未許春  
放出江邊無數橘  
半黃半綠惱騷人

宋詩鈔卷八十一

欽定四庫全書薈要卷二萬三百三十五

集部

宋詩鈔卷八十二

內閣中書舍人吳之振編

林光朝父軒詩鈔

光朝字謙之閩之莆田人隆興元年進士任袁州  
司戶參軍知永福縣召為秘書省正字歷著作佐郎  
國子司業出提點廣東西刑獄徙轉運副使加直寶  
謨閣召拜國子祭酒除中書舍人以集英殿修撰出

知婺州提舉興國宮卒光朝學於陸子正子正學於  
尹焞而光朝之學一傳為林亦之再傳為陳藻三傳  
為林希逸其師友之際如此林俊曰艾翁不但道學  
倡莆詩亦莆之祖用字命意無及者後村雖工其深  
厚未至也

送別湖北漕李秘監

文字眇煙雲過眼徒浩浩所有未見書惜哉吾已老子  
雲客長安陳迹如一掃同叔向來人我生苦不早亦聞

青城山斯翁為有道瞿塘不可上秋夢長顛倒白日来  
西崑一見自應好縱譚百代前至境非枯槁多為開口  
笑明月生懷抱黃鶴有高樓恍如事幽討攬轡逢道州  
聽書下下考周南勿留滯掇拾供史藁分手重酸辛璫  
璣衆所寶十日不得面何為太草草

送別姚國博知處州分韻得綠字

銅盤白露下松桂淨如沐  
嬾彼菊花團西風吹醺醺  
長安多別離此別苦不足  
人物如使君容易等潘陸  
一自

海東頭清颺起謠俗館下欲何言聯翩如破竹功名不  
徒爾無乃相迫逐雙日訪延英行矣公勿卜括蒼煙雨  
前寒光貫岩腹大叫出銀鬕邂逅聚百族要攜三月糧  
所厭惟一朶幸心忽開張何曾畏笑慘單父勿長吁來  
者猶可續道旁有抵壁天下輕結綠一夕洲渚言令我  
沉心曲

代陳季若上倉使

大塊始開鑿媧皇為補天天平雷雨正后稷誨之田大

浸十二歲流金復七年幸哉堯湯民以手摩撫然徂丘  
虐焰起秦俗相焚煎官租奪以半飽食何資緣自從漢  
道昌敦朴乃其先初開常平議聚粟如源泉年登穀價  
賤散以大農錢旱潦或艱食用之如轉圜悠悠百王心  
皎皎三代前井田日以壞此法當磨鐫公侯希世珍秀  
色媚長川官學有根株誦詩三百篇風土無隱情是為  
大夫賢搏飯哺赤子當食長爾憐江東百萬戶彫俗生  
春妍持節閩嶺初有如病者痊劉晏取予術夷吾輕重

權義倉有粟腐物價敢喧閤斯助阜民政南風吹五絃  
晝日公侯門客車動百千下吏走塵土從容愧執鞭豈  
不隨吹噓譬彼乘風船長技非卓魯主德奚由宣松竹  
伴孤吟敢懷歲月遷終酬國士知未甘長棄捐

石渠行送別福建參議李著作器之

我來石渠五十六雙髻如蓬腰未曲豈為健筆有徐庾  
自數來時六十五誰解辛苦續子虛長安有客四十餘  
已老成翁不肖去青藜當戶夜讀書東觀丈人起遐想

無為歲月空踟躕去作諸侯老賓客可無綠水兼紅蕖  
我家東下纔百里釣螺一曲清無滓草堂為築荔枝斜  
濯錦江頭有如是子思子方道為尊南國佳人如秋雲  
不知公侯有朱箔要問常州李著作

資中行奉寄臨邛守宇文郎中

銅駝陌上生秋草前者刻石今如掃僭邊半紙半模糊  
下牀三日成悲惱蒼史萌芽何可見要從筆意生秦漢  
欲將奇字問何人所守一家如小篆是中變幻隨形模

鐘鐻鼎鬲匱盤盂如何兩京到魏晉摻盡蒼崖惟此書  
即今原隸見顛末仍於畫上分錙銖燕然有年固可紀  
筆勢豈得先黃初中郎袖手欲無作正始不逮況其餘  
幸哉一見俱抵掌翩翩如反古石渠且說金陵佛屋何  
年燈晉分隋張猶青熒忽聽荒鷄還自起資中之刻不  
徒爾

鞭春行

轆轤胃寒田雀飢江梅落蛙兔脚肥枯腸一夜轉雙轂

眼光吹上蝦蟇衣  
岩腹新晴山鬼哭  
女媧墳外春風歸  
繭村紙簾大如席  
拆拆藜杖金雀飛

癡頑不識字歌許叔節來詩有此句因以名篇

平生讀書如風過耳  
歲月共流轉如磨復如蟻  
一如人嚼蠟而不見其味  
又如弄孤杵連夜不成米  
又如過羊腸十步復一止  
年頭月尾無一是咄咄  
癡頑不識字見君詩  
舌如繭愧我為人師  
怪怪奇奇如懸崖萬仞  
龍蟠古樹枝又如生馬  
不施鞚而馳又如錦苔  
封漫峴山千

年墮淚碑又如玉關客血上老犀衣盧仝孟郊骨已朽  
眼睛頭顱何人相傳授與君往還歲月久比來春風入  
我牖便覺岩前草木件件有生意跨蹇驢出古寺欲訪  
子雲問難字

乞竹鷄

疎籬短短花枝開鳩婦不鳴天雨寒鳩婦離家二百日  
亦有姊妹依故山黃糧不甯啄欲去羽衣殘主人一見  
一憐汝抱取東家竹鷄來戲聚孤村落日不相識各各

哀鳴求其主兩鳥勿驚遽低頭聽我語鳩婦入我家必  
殺入我口牀頭瓶罌無餘粒養汝一到十日後東堂數  
竹夾新蹊兒童牢落惟愛一竹鷄堂心有胥井飢則哺  
其泥主人緣窓安淨几丹碧相依安用此竹鷄竹鷄慎  
勿傍人飛我屋三間沉白蟻

冬至

橫枝凍雀昨夜死水底黏魚吹不起小伶切玉孤鳳愁  
九寸之管傳生意舞雩山下逢丈人植杖無語空逡巡

再拜丈人欲識桑麻生長力  
鬼蝶翻覆梅花春我於萬  
物亦一物何時春風到肌骨  
空山鐵鐫年月深一語不  
破天地心

吏部尚書林公梅卿挽詞

百紙梅花賦聲名出渚東  
向來惟李賀勝處是揚雄  
遶屋看書帶逢人說刺桐  
尚書舊時履只合步春風

次韻奉酬趙校書子直

雁塔新題墨未乾  
去年燈火向秋闌  
趣看天祿青藜杖

怕着王孫紫綺冠好在三山尋浩渺何如一紙問平安  
觚稜皎月無人到玉糝初成許共餐

次韻呈胡侍郎邦衡并引

某竊觀侍講侍郎先生大書著作之庭其形摹濫觴  
發於小篆豈八分未出已有此書又蒙傳示銀杏魚  
簡之什謹次韻奉和

聲教從今已遠覃翩翩作者問誰堪石經猶有中郎蔡  
金匱曾誇太史談至竟銀鈎并鐵畫相傳海北到天南

諸生考古頭渾白禹穴何時更許探

九日同出真珠園再用前韻

來自清源葛已覃君王問獵我猶堪百年耆舊如重見  
九日登臨得縱談才子不知汾水上仙人長在大江南  
明珠照夜應無數要是層波更好探

送別傅郎中安道持節閩中

忽然鄉思若為收莫到三茅最上頭二月東甌看負弩  
一天南蕩想行舟過家上冢從今數落絮飛花合畫遊

料得甘泉來奏計，定應前席莫遲留。

八月十五日道出南昌寄龔帥實之兼呈程泰之

劉文潛二漕

未應雙井即塵埃，似此衣冠得幾回。  
國子先生還並駕，洪都新府却重開。  
再三為問滕王閣，第一須登孺子臺。  
定向此中修翫事，江邊不道故人来。

閏月九日登越王臺次韻經畧敷文所寄詩

閒陪小隊出山椒，為有吳歌雜楚謠。  
縱道菊花如昨日

要看湯餅作三朝千重嶺海供橫梁一帶風煙聽采樵  
憑仗折衝如此好不應東去更乘輶

再次前韻

却趁秋旻別九韶扶胥直下聽風謠瀾翻對酒還終夕  
火急催詩在詔朝南國更逢陶令菊西江莫扞楚人樵  
自應幕下文書少節制如今屬漢軺

前歲過真陽初識子欽今道出曲江不忍遽分手  
偶成長句以志兩處山川人物之勝亦少慰別

來耿耿耳

秋崖一夕卷炎蒸那更揮斤為斲冰  
碧落舊尋燒藥竈白芒長對讀書燈  
相期大庾何多日似出浮屠向上層  
縱有分張吾未老定從臺閣看飛騰

送別奉常林使君黃中易守延平

去時胡不到瓜時上日多應柳絮飛  
卧轍只緣膝壤少懷章須要越人肥  
三千儀禮非綿蕞五十行春尚綵衣  
莫愛傳經似齊魯石渠長是待公歸

枕疾逾旬蒙丞相訪問仍辱寵示名篇輒搜枯腸  
次嚴韻以塞來使

丞相嚴裝似燕居為憐消渴到相如病多得艾三年遠  
歌雜成琴十日餘綠野忽傳春草句白頭還對朶雲書  
若為追逐園林勝百轉愁腸亦少舒

芹齋詩

并引

往時從林刪定時隱為招提之集語某以吾於九仙  
作見一庵丘壑之念未嘗一日去心比挂冠得請又

欣然相語曰吾將作屋數間老於芹下吾老矣從此  
皆空閒日子所未能忘書卷一事耳吳興別乘代者  
以期告而公有是舉壯矣哉夾漈唱酬之什皆一時  
顯者於其最後也作芹齋詩

春風芹下足遲留白鳥平田憶舊遊說盡軒裳還過眼  
讀殘書卷復重頭偶逢隱几何須問不到投簪便擬休  
平世聲名如皦日欲將何地置巢由

奉題游洋張明府流香亭時以薦章數下涉秋月

馬首且欲西矣因以寄意云

封題青李數緋桃處分園林意自豪旋出篇章陪樂府  
更憑花木續離騷醪醑架下提春榼蘆蒿林中滴夜槽  
却是秋風生馬耳未應老大笑牛刀

送別陳侍郎應求知泉州

并引

某竊觀蔡公侍郎嘗大書於洛陽橋之上侍郎過洛  
陽當摩挲此石彷彿為同日事也某送別到惠安道  
中因以賦詩云

百片牙旗水面長  
蔡邕題在刺桐鄉  
十年杯酒開雲榭  
一樣官街過洛陽  
我亦攜家緣送客  
誰能掃地自焚香  
野橋衝臘寒梅白  
莫要登臨憶侍郎

傅使君安道再有治莆之命  
取道城外還泉南得  
來書云已出千里

何事風流舊使君  
江邊聽說下朱幡  
逢迎要問平津邸  
準擬來呼垤澤門  
竹馬已喧明月浦  
籃輿却出杏花村  
不知錦瑟流傳徧  
欲愈頭風好細論

挽李制幹子誠

千金治產似孫吳，珠箔銀觥只自如。  
問我長風當夕起，數他極浦落帆初。  
自知汗簡今千軸，更說生犀有幾株。  
赤壁當年遇黃蓋，周郎何惜借吹噓。

文字紛紛更問兵，秋燈束髮尚青瑩。  
便令三子成門戶，却許諸孫說典刑。  
隔水忽傳朝露曲，行人長數夕陽亭。  
河東健筆惟諸薛，梅子岡邊為勒銘。

別方次雲

姑蘓臺上姑蘓館共說南山竹火爐湖上相逢又相別  
不知何處說姑蘓

代陳季若上張帥

柳堤九曲暗青絲畫戟叢中畫影遲傳說姑蘓新樂府  
祇緣太守例能詩

直甫見示次雲乞豫章集數詩偶成小絕因以自  
喻

脩水佳人白玉欄花前何似妾容顏從來未省傷春意

猶自樓頭畫遠山

莫怪騷人太頡頏曾聞阿母語劉郎神仙本自無言說  
尸解由來最下方

吳容州仲一挽詞

竹屋繩橋自有村牛山簫笛不堪聞碑前更問何年月  
為借容州舊使君

哭徐刪定德襄

脩文巷裏莫春前欲上旗亭問客船忽有短牋無寄處

魚梁却在淚痕邊

忽然白晝自生哀立馬橋東喚不回驚起何波理殘夢  
十年燈火上心來

哭伯兄鵲山處士蒿里曲


竊觀之近古葬顯者則歌薤露又有蒿里之曲施諸  
閭巷乃取鵲山號哭之聲作是曲

殘雲衰草趁人愁生即團樂死便休悲泣聲中裁此曲  
鷄啾山外鵲山頭

長記藜牀發問初翩翩出語自無餘斯翁胸腹平如水  
不在塵埃數卷書

桐棺三寸更何疑却取江楓短作碑惟有一般蒿里曲  
長簫欲斷更教吹

宋詩鈔卷八十二



總校官庶吉士臣張能照  
校對官檢討臣王鍾健  
謄錄監生臣葉椿